

Vader Anchises (Verg. Aen. VI, 679-712)

At pater Anchīsēs penitus convalle virente  
inclūsās animās superumque ad lūmen itūrās 680  
lūstrābat studiō recolēns, omnemque suōrum  
forte recēnsēbat numerum, cārōsque nepōtēs  
fātaque fortunāsque virum mōrēsque manūsque.  
Isque ubi tendentem adversum per grāmīna vīdit  
Aenēān, alacrīs palmās utrāsque tetendit, 685  
effūsaeque genīs lacrimae et vōx excidit ōre:  
‘Vēnistī tandem, tuaque exspectāta parentī  
vīcit iter dūrum pietās? Datur ōra tuērī,  
nāte, tua et nōtās audīre et reddere vōcēs?  
Sīc equidem dūcēbam animō rēbarque futūrum 690  
tempora dīnumerāns, nec mē mea cūra fefellit.  
Quās ego tē terrās et quanta per aequora vectum  
accipiō! Quantīs iactātum, nāte, perīclīs!  
Quam metuī nē quid Libyae tibi rēgna nocērent!’  
Ille autem: ‘Tua mē, genitor, tua trīstis imāgō 695  
saepius occurrēns haec līmina tendere adēgit;  
stant sale Tyrrhēnō classēs. Dā iungere dextram,  
dā, genitor, tēque amplexū nē subtrahe nostrō.’  
Sīc memorāns largō flētū simul ōra rigābat.  
Ter cōnātus ibi collō dare bracchia circum; 700  
ter frūstrā comprēnsa manūs effūgit imāgō,  
pār levibus ventīs volucrīque simillima somnō.  
Intereā videt Aenēās in valle reductā  
sēclūsū nemus et virgulta sonantia silvae,  
Lēthaeumque domōs placidās quī praenatat amnem. 705  
Hunc circum innumerae gentēs populīque volābant:  
ac, veluti in prātīs ubi apēs aestāte serēnā  
flōribus īnsīdunt variīs et candida circum  
līlia funduntur, strepit omnis murmure campus.  
Horrēscit vīsū subitō causāsque requīrit 710  
īnscius Aenēās, quae sint ea flūmina porrō,  
quīve virī tantō complērint agmine rīpās.